

四庫全書

集部

欽定四庫全書

集部

聖祖仁皇帝御製文集卷

二十九至
三十四

臣 永瑤 恭 校

侍讀臣孫球覆勘

覆校官中書 臣 施光輅

校對官助教 臣 胡于襄

謄錄貢生 臣 吳紹昆

欽定四庫全書

聖祖仁皇帝御製文集卷二十九目錄

雜著

書通鑑綱目後

閱皇明祖訓偶書

紀苗事

書蘭亭帖後

讀楚辭

喻馬

連珠

有序

祭文

祭明太祖文

祭至聖先師孔子文

祭元聖周公文

諭祭江南江西總督于成龍文

諭祭江南江西總督于成龍第二道文

欽定四庫全書

聖祖仁皇帝御製文集卷二十九

雜著

書通鑑綱目後

史之作也不惟其備紀載而已將以昭勸懲於萬世自
孔子作春秋以明天德以彰王事善善惡惡之間褒貶
見焉故其文則史也其抑揚予奪之法即經也自是而
降一代之興必有一代之史皆易編年為紀傳本末具

於篇中是非備於論贊至司馬光綜括古今為通鑑一書采獲詳博考據精嚴為諸史之大成然據事臚列褒貶之義或闕此朱子綱目所以繼春秋而作也然考歷朝正史之外有金履祥通鑑前編以及馬總之通歷宋庠之通譜靡不網羅舊聞多所引證然終不若朱子之綱目為切要而純正信乎其有功於世道人心非淺鮮也觀其自序之言曰大書以提要分注以備言使詳略同異通貫曉析如指諸掌蓋隱然不敢當筆削之意焉

然其邪正是非之辨賢姦忠佞之分寓大義於微詞紹
素王之心法麟經以後惟有此書朕披讀尋繹弗釋於
懷治天下者其視此為龜鑑也夫

閱皇明祖訓偶書

朕遐稽載籍近考前朝凡裨治理之書必殫精深之蘊
豈徒以其文焉而愛悅之已哉皇明祖訓一書萃列后
之謨兼衆智之英至於去邪納諫之規勤政慎刑之誠
內而宮闈之禮教外而朝堂之政令胥盡於斯焉迨其

後世子孫漸至於陵替者豈其貽謀之未臧歟由不能
善守之故也朕披覽之際心焉景慕常以為鑒因書以
記之

紀苗事

王師之平蜀也大破逆賊王平藩於保寧獲苗人三千
皆釋而歸之及進兵滇中吳世璠窮蹙遣苗人濟師以
拒我苗不肯行曰天朝活我恩德至厚我安忍以兵刃
相加遺耶夫苗之獷悍不可以禮義馴束宜若天性然

者一旦感恩懷德不忍輕倍其上有中土人士所未易
能者而苗顧能之是可異也雖然其又何異之有昔有
虞舜羽三苗格姬文因壘崇墉降叔弓禮俘南蒯走荀
吳却叛戴韞拘仲鬲遣質莎車來諸葛攻心南人服皆
不事斬艾以恩信相約結而敵人自歸已事具在苗奚
異焉且夫苗其種蠻也其居荒外也而其性則猶然秉
彝好德之人也子輿氏不云乎以力服人者非心服也
力不足也以德服人中心悅而誠服也獨謂苗而異乎

人而不可以德服也耶

書蘭亭帖後

唐文皇嗜蘭亭帖至竭萬乘之力多方以購之又時撫
善本賜其臣僚可謂勤矣而卒無妨於治國理民之政
蓋其納諫受言力行仁義所圖者大舉凡游藝之事不
足以累之況寄心翰墨於幾務之餘豈非前王之令軌
哉推考其時貞觀之風幾與三代比隆其仁心善政可
施於後世者多矣高山在望景行行止寧獨於蘭亭一

事哉

讀楚辭

朕讀屈原書往復不厭豈直以其文辭哉蓋其浩然之
氣畜積鬱勃磅礴激越故其發於咏歌嗟歎之間不能
自己自非實有其忠君愛國繼繼惻怛之誠亦烏能若
此耶是以往復讀之尋其指意之所出而於是乎有取
焉耳昔子輿氏論浩然之氣謂直養無害則塞乎天地
之間若屈原者實有是氣可知矣司馬遷謂可與日月

爭光者豈謬語哉夫其所養如此故其言曰誰能以身
之察察受物之汶汶者乎又安能以皓皓之白而蒙世
之溫蠖乎卒自沉於汨羅信乎其忠也或者乃臆測天
問九章謂其實無沉淵之事士生於千載之下欲懸斷
千載以上之是非蓋已難矣矧並其所行之事以有無
變易其說其好奇失實為已甚朕所以惡夫輕議古人
者也至如屈子之行昭昭在天壤間者而可沒其實耶

喻馬

伯樂嘗薦九方臯於秦穆公公使行求馬三月而反報之曰已得之矣在沙邱牝而黃使人往取之則牡而驪公以讓伯樂伯樂曰是所相者天機也有貴乎馬者也得其精而忘其粗在其內而忘其外及馬至果天下之馬也是說也吾嘗疑之夫馬之行於地也猶士之用於世也君子之觀人也聽其言然後察其行故曰視其所以觀其所由察其所安其不略乎外而遺其粗也如是世有色物牝牡之不知而可以得善馬者乎是不必納言

試功而可以盡天下之士也非通人之論也且夫千里之馬世不恒有而馬之用不可一日而或缺其上馬者以之備輿衛充十二閑次則供戎事下者亦可以服轅而代步天下固無不可用之馬也使必待遠筋駿才而後用之則利用致遠之道或幾乎絕矣故善相馬者天下無棄馬善相士者天下無棄材嗚呼此器使之方也歟

連珠

有序

朕嘗觀揚雄博綜藝文敘述短章名曰連珠班固賈

達傳毅諸人相繼有作昔人所謂辭麗言約合於古
詩諷興之義良不虛也效其體作數首以示侍臣雖
亦假物陳義至於託寄高遠殊讓古人爾

蓋聞動靜互宅所以乘陰陽之機張弛咸宜所以體剛
柔之撰是以春溫秋肅四時之玉燭常調山結川融八
柱之金樞永奠

蓋聞海水納其所出故浩大而無涯車輪復其所過故
廣遠而不滯是以善由虛受而萬物歸懷德本健行而

上天合契

蓋聞雋時之士以之應變則乖蹈故之儒以之經方則拙是以夏蟲不可以語冰而秋蟬不足以知雪

蓋聞上之御下不貴挈瓶之智下之比上必由盈缶之孚是以教戰以忠非察慧之用救饑以信無匱乏之虞蓋聞興善察庶朝廷之典安上庇下臣子之忠是以叔向賀貧在建德以為本子文逃富不勤民以自封

蓋聞錫爵酬庸必首進賢之典疏勲命秩宜先勸善之

褒是以潞子見拘士伯分田於瓜衍箕師告捷胥臣受
縣於先茅

盖聞仁義之性不因地而遷移貞白之姿不隨時為豐
嗇是以蘭蕙生於幽谷不以居僻而損其芳松栢產於
茂林不以歲寒而凋其色

盖聞律呂迭宣而音以蕭條為主采章代變而形以寂
寞為君是以樂主人和非緣鐘鼓之節禮由天秩不傳
玉帛之文

盖聞舞羽之朝不廢刑章之設畫衣之制實輔禮教之窮是以嚴父之威期於式穀慈母之愛寓於折筭

盖聞德之所屆靡遠弗周化之所孚無幽不被是以祝網中之飛翮而六合戴其恩蔭穢下之暍人而九州懷其惠

盖聞吳歆越吟異轉而皆樂荆豔楚舞殊姿而並妍是以五方墳壚咸興謠於堯壤八方燥濕同被化於虞絃

祭文

祭明太祖文

自古歷代帝王繼天立極功德並隆治統道統昭垂奕
世朕君臨海寓運會昇平軫念民生省方問俗途經白
下憑眺鍾山緬憶前徽興言往烈園陵入望瞻封樹之
依然史冊可徵企芳規之儼在儀章式舉殷禮聿稱敬
遣耑官代陳牲帛爰申禋祀之誠用著景行之志冀神
爽其不昧降雲車以格歆

祭至聖先師孔子文

仰惟先師德侔元化聖集大成開萬世之文明樹百王之儀範永言光烈罔不欽崇朕丕御鴻圖緬懷至道憲章往哲矩矱前模夕惕朝乾覃精思於六籍居今稽古期雅化於萬方繫惟典訓之功實覩乂安之效茲者巡省方國至於岱宗瞻望魯邦爰來闕里空堂至止恍聞絲竹之聲舊寢徘徊喜動宮牆之色車服禮器宛然三代遺風几杖冊書負矣千秋盛蹟愜明靈之儼在文治遐昌肅裡祀以惟虔精忱庶格

祭元聖周公文

惟公丕承聖緒懋叙人倫光烈覲揚成一家之繼述官
禮制作垂萬世之經常道闡圖書探六爻而易貢心傳
精一兼三代以訏謨啟東魯之典型猶存故澤入尼山
之夢寐未墜斯文朕稽古省方瞻言至止郊原縱目遙
深松栢之思廟貌崇觀爰切羹牆之慕特申祇薦代以
親藩惟冀神靈尚克歆饗

諭祭江南江西總督于成龍文

朕惟國家敷治簡賢道先保障人臣奉公奏最節重清
勤苟四知之克嚴歷終身而弗替寵褒宜貴恩恤用昭
尔于成龍志篤醇誠誼敦貞介甫膺民社聿著循聲既
懋旬宣彌彰令績是用畀以節鉞綏乃邦畿尔克撫字
維勤苞苴盡絕迨兩江遷鎮一節罔渝馭下則大草貪
風勵已則寒同儒素雖古廉吏曷以加茲迺倚任方殷
遂溘焉淪逝軫懷良惻異數頻頒嗚呼蕭然官舍竟擔
石之無存煥矣綸章庶泉臺之克慰必芬在御尚其歆

承

諭祭江南江西總督于成龍第二道文

惟尔苦節克貞鞠躬匪懈真一介之弗取越數官而彌
堅奄忽云亡能無憫盡嗚呼清風未遠長存表德之思
寵卹重頒丕著旌賢之典尔靈不昧其克欽承

聖祖仁皇帝御製文集卷二十九

欽定四庫全書

聖祖仁皇帝御製文集卷三十目錄

賦

春雨賦

梧桐賦

弩賦

并序

夜亮木賦

并序

西苑芙蕖賦

松賦

玉泉賦

行殿讀書賦并序

竹賦并序

闕里古檜賦并序

欽定四庫全書卷

聖祖仁皇帝御製文集卷三十

賦

春雨賦

神籥網緼化機和煦元氣上融醲膏下聚首五行者曰
水潤萬物者惟雨于時蒼祇蒞節青鳥司晨餘寒未斂
禁火方新風輕颺以習習雲密布而鱗鱗垂九霄之嘉
澍飛四野之甘津始觸石以吐液旋彌空而散澤初曳

縷以吹絲繼緣雷而滴墀乍密還踈欲斷又續拂宇披
檐挹川注谷既磅礴而淋漓亦瀾漫而滲漉夏綺埒之
明璣流銅池之文穀木欣欣以向榮草萋萋而如沐若
夫徂畛徂隰是藂是穠塍麥漸秀田禾始苗廣地道之
發育資土脈之沃饒雖霑體而塗足幸渥葉而濡條况
乃灌溉神州濺汪赤縣無遠弗届靡幽不遍灑郊牧而
歡呼浹寰瀛而舞忭慶玉燭之長調喜豐年之屢見夫
惟天地之德廣大無私春生夏長雲行雨施寓栽培於

無意普美利於不知植品物以咸若含細大而莫遺所以解澤旁皇湛恩深厚覆被民生惠鮮隴畝興有滄於三陽敷仙霖於千耦世並享夫豐亨俗咸登於仁壽洋洋乎造物之弘功予一人乎何有

梧桐賦

撫萬彙之生成攬植物之暢茂見藹藹之梧桐為良材之僅覲當綺閣而結柯臨玉階而吐秀既託根以得地亦含靈而迎候扇淑景於春陽振英華於清晝揚緹瑤

樹布葉金鑾碧滋密綴翠纈深攢散澄暉於幃幄濯鮮
色於琅玕被光華於日月耀羽儀於鳳鸞迺有釀雲上
覆瓊泉下浸長浥潤於丹穹永敷榮於紫禁雨滴疎聲
風吹籟鳴乍饗迴於環珮已樂合於竽笙若夫新條始
引清露初流如潔清之士邈焉而寡儔挺節無撓陵虛
欲上如謬直之臣介然而不黨羣羣者其陰可以矢卷
阿之頌音離離者其實可以廣湛露之雅什韻虞氏之
文琴絙軒皇之素瑟信天地之嘉生非凡材之能匹彼

夫桃李之佳蔭松栢之貞心甘棠蔽芾於南國玉樹青
蔥於上林雖留詠於在昔詎埒美於斯今至於嶧山孤
立之姿龍門百尺之榦或擢本於邱樊或漸色於巖畔
豈若茲樹之曜穎朝陽植枝霄漢負聳壑之遐標增麗
城之榮觀也哉

弩賦

并序

弩之制昉於有熊氏周禮掌之橐人後世寢失其巧
爰命工人規古遺制而神明之省度悲合迺為賦曰

觀五材之利用美四弩之超羣法軒轅之天巧象枉矢
之星文關施牙列樞合機分爾其勢若迅雷形如規月
雪鏃騫騰霜鋌激越邁白的神奇埒黃間之飄忽墜
百石於三連引千鈞於一髮若爾秋原蕭颯春草縈茸
長楸獵馬甫草軍容既省括而命中亦裂背而洞胷弋
封狐於巨壑射飛隼於高墉至於魚麗六師龍驤萬騎
羽箭霆鳴雕弧雨厲踰貫蝨以呈能軼穿楊而逞藝彼
夫黑貂朱戟玉劍金鋌或收功於後勁或制勝於中權

雖宣威而克敵未屆遠而乘堅豈與夫夾庾唐大之制
同垂烈於戎旃

夜亮木賦

并序

塞上古木夜視有光遇雨益明移置室中即之可以
燭物嘉其有異故賦

猗嘉木之迥異垂四照之華英蜿蜒輪囷於川壤萃盤錯
於柯莖外稟異德內蘊離精煥然夕皎灼爾宵明晚瑞
星之初麗炯璧月之漸生既騰輝於山谷亦揚彩於檐

楹若乃靈根濯雨榮枝浥露芳澤加鮮澄暉遠布方隱
之而彌耀旋即之而如晤洵昭質之無虧何冥行之是
懼爾迺金膏地蕊鶴皤韜光獨飛燦而振采長煜煜以
煌煌吐瓊文於赤水懸瑤景於昆岡非朝華而夕謝殆
積闇以能彰於是列之桂宮置以椒室流映金鋪近燭
絢帙豈浮豔之為容亮靈竒之足述庶含章之可貞雖
在野而靡失

西苑芙蓉賦

惟澤芝誌於爾雅菡萏詠於風詩繫金塘之麗草允柳
沼之朱儀夫其的爍輕莎翩躑清瀨玉節蟠根翠羽襍
蓋縷黃作鬚跼紫成蒂蔭太液之漣漪蕩昆明之霧靄
爾乃幽房晨折芳葩夜舒前迎丹殿後匝瑤除高披直
道斜嬈周廬萋萋川碧綠綠天虛光留錦鴛陰曖文魚
葉漾珠而錯落影翻月而軒渠若夫黛罨如烟華濃似
綺藻采橫洲靄雲被沚或雪沁瓊英螺含碧鵲桃倩紅
敷菊分金蕊競秀揚輝爛分出水如仰如俯似低復昂

亭亭交倚田田並將宛若瑤林之四映矯如朱鷺之載翔至於萍合橋痕蒲牽波縠溪靜禽喧臺高樹複梅雨滴而浮馨麥飈扇而散馥氤氲於講席之書郁烈乎侍臣之服間命沙棠之楫駕芙蓉之舟似塞華峰之種無待汾水之謳宴羣工於在鎬聊悅豫以凝庥蓋其擢素挺生拔泥不滓外直中通花榮實旨潔比高人清同君子是以廬山則淵明屈焉濂溪則惇頤樂只余願賢士之釋荷裳乃睠幽姿而不自已

松賦

猗歟喬松鍾靈上苑柯百尺以如蹇蓋千年而欲偃散
積秀於蓮峰蔭孤芳於蘭畹標豔冶之不矜抗風塵其
獨遠若夫盤根泰岱聳幹匡廬涵貞溫岫映彩嵩衢比
德則質符君子授秩則名榮大夫三眠遜其勁節百木
讓為仙株爾其綠玉抽鍼黛蛾攢葉天矯蚪鱗騰遯龍
鬣謾謾離羣森森爽睫碧駕嶧桐翠增堯莢至十圍翁
鬱連抱龍從濤乍驚而疑雨聲既遠而猶風弘景聞之

於牖北陶潛撫彼於離東更若招栢為朋呼筠偕響白
兔頻遊青牛時往蘿蔦旁牽芝苓暗長落氛霧於瓊階
藹菁蔥於書幌或俯垂紫磴或斜倚清池鷺獨騫而啄
實鶴載舞而巢枝日騰照兮光蔚蒼月流素兮陰紛披
繫符邱之神王羌偃佺所心怡是以茂姿式詠於雅詩
貞修表揚於戴禮箕山則棟欲生雲石室則脂堪作餌
非幽品之可懷曷詳美於圖史至若皂衣迎氣白草迷
煙雪霏千里冰凝萬川橘柚罷色杞梓藏妍獨斯樹之

不改歷歲寒而蒼然涼飈至弗移其操
涇陰積彌著其堅信國家之楨幹而表德者所取焉

玉泉賦

若夫天產瑰奇地標靈迴融則川流峙惟山靜撫風壤之清淳對玉泉之幽靚信芳甸之名區而神臯之勝境也爾其洞壑屢屢巖巖阿叢複源出高岡溜生寒麓瑤竇濺珠瓊沙歛玉控以翔螭引之鳴瀑初噴薄以飄絲旋潑洄而曳縠既澆滑於澗谿遂渺瀰於陵陸倅色則素

纈無痕儷質則纖塵不屬挹味則如醴如膏揣聲則為
琴為筑於是長輪遠逝澶漫演迤曲之為沼渟之為池
拭一泓之明鏡馮千頃之琉璃排玲瓏之雁齒跨蜿蜒
之虹髻拓澄湖而西匯環仙籞而東馳當其春日載陽
惠風潛扇草綠初芽柳黃欲綫捲百尺之湘漪拖十重
之楚練蔭遠樹之芊緜泛落英之蔥蒨及夫長羸屈節
新漲平堤林霏夕斂嵐彩晨飛抽碧筍以徐引綴丹的
以紛披展含風之翠葆褰裛露之紅衣若乃炎歊既回

鮮飈疎豁泠泠桂間嫋嫋蘋末見鳬鴈之沉浮望煙雲
之出沒掬皓魄於晴瀾散清暉於深樾至於淒辰中律
水樹蕭騷木葉盡脫微霜始飄耿冰雪以流映擁貞萋
而後凋攬六宇之曠邈寄余懷於沈寥是其為狀也何
時不妍何妍不極境近心遠目營神逸有林垆之美而
無待於攀躋有亭榭之安而無勞於雕飾豈所語於入
華林者擬濠濮之遊涉太液者象蓬瀛之域也耶

行殿讀書賦

并序

東巡十有餘日矣寒夜初永行帷清肅取大易尚書
及前代史籍探索披覽夜分乃休侍臣高士竒每以
過勞為請然朕勤政愛民之外惟涵泳乎詩書心契
古人寤寐勿倦非此何以自樂耶乃作行殿讀書賦
以示之

紹

三后之令緒兮撫曩代之遺蹤爰省方而設教兮言時
巡於兗東軫予懷於部屋兮息予駕於蒿宮發圖書於

行笈兮窮墳典之淵通溯帝王之餘烈兮勤效法之深
衷昔唐虞之詢岳兮闢四門而明目禹泣罪而下車兮
湯解網以致祝文獵渭以求賢兮武邁邦以問俗景列
聖之芳模兮睇千秋之懿躅庶咸五而登三兮亦覲光
而式穀惟時商秋甫謝寒律初尋風日高肅雲物蕭森
陳羽衛之清約兮憇帷宮之靜深愛三冬之暇景兮惜
萬幾之餘陰於是心曠神怡氣恬神攝玉蚪晝嚴銅螭
宵歇望山海之崇深兮凜載登而載涉詎博洽之自矜

兮何菁華之足獵鄙虞初之屬車兮陋河東之遺篋冀
文教之永敷兮播風聲而四浹

竹賦并序

江南修竹成林森如綠玉見輒愛之昔人所以歌君
子也舟行間暇偶作賦曰

攬嘉生之植物美修竹之嫵媚振歲筵以擢地結蒼翠
而叅天吐碧鮮於原隰含玉潤於山川拂丹霄以煥采
濯晨露以增妍爾其體本貞堅性惟高子欸欸虛中亭

亭秀越居遠俗以無塵生自然而有列游必集於鵷鸞
色不渝於霜雪抱君子之德生豈凡姿之可埒至於汗
青為簡截管成聲文章彬郁律呂和鳴流兩間之元化
開萬古之菁英亦有蕩材敷布箭括叢生鏃礪作器規
矩中程或垂美於九府或程能於五兵斯其為致用之
廣遠尤不可以一得名也至若淇澳見稱於衛國夾池
作賦於梁園詠千畝於渭上想一葉於湘潭固不絕羣
標傑意殊態嚴沉爾闕北秋高江南地潔見衆茂之咸

凋知孤貞之自結巨榦凌風修莖映月豈徒覽夫清陰
實興感乎勁節何當植根綺殿布影彤庭彩鸞下集丹
鳳載鳴將曉餐夫珠寶亦暮託於紺莖迺其峭蒨之容
檀欒之美繁條綴青芳筠孕紫散夏景於瑤林蔭春華
於仙沚曼素籟以風疎被青暉而雲委影入戶而窺簷
聲含宮而嚼徵亦足以怡情適性娛目賞心徘徊晨夕
抒寫高吟響蕭蕭而隱几颺颺以開襟披十重之綳
帙鼓五弦之雅琴聊濡毫以成賦寄予思於遙深

闕里古檜賦

并序

孔子手植檜在杏壇之側金貞祐間無復存矣元至
元三十年再茁故處明弘治間又燬於火今所遺者
不枯不榮屹立霜露而秀色獨異撫摩久之迺作賦
曰

維槎枿之靈質實鈞化之所鍾標扶輿之奇特峙先聖
之故宮涵元氣以不朽與至道而俱崇爾其黛黼蒼蒼
孤柯濯濯鶴骨初扶霜鱗未作儼茁軋以方舒類鴻荒

之忽鑿謝縛采於春華完淳風於大樸天矯拂勃星臨
露滴枝無取於樛樛葉全稀於撼撼夕飈度兮弗驚朝
旭烘兮如滌伊間氣之潛滋惟神爽之咸集徘徊延却
宛轉斷連蟠屈兮若侑羽之在列聳削兮若簏簾之待
懸則有策以崇封沃以膏壤方以周闡角以文礫足縮
心歔目給神賞蘿煙奪翠松籟失響於是楷因之而擢
穎著感之而抽莖爭歲綻於絃誦之里齊扶疎於禮樂
之庭朝菌慚兮一旦大椿讓兮千齡上泝真宰之功遠

契無為之代均雲行兮雨施等乾始兮坤載疇則出混
茫之中而居耳目之外與三才以竝植繇厯禩其長在
亦有扶桑海表若木山顛東瀛西極揭日摩天迹雖誇
於神異植非出於文宣宜瞠乎其後矣邈無得而稱焉

聖祖仁皇帝御製文集卷三十

欽定四庫全書

聖祖仁皇帝御製文集卷三十一目錄

古今體詩五十二首

元旦

上元

覽貞觀政要

慈寧宮問

太皇太后安

月

昭仁殿

春夜

賜舊時講學

賜撫遠大將軍圖海二首

春日

夜半

琴

晚春遊幸感懷

河

白洋湖

船獵

水村

鄭州河道

喜雨

賜寧古塔將軍巴海詩

并序

橋望

郊外即事

郊外偶作

馬上口占

複道口占

夏日登景山同翰林張英高士奇作

夜靜讀書

內廐閱馬

夏日同大學士明珠暨諸侍衛過黑龍潭途中

作

黑龍潭

由廣泉寺至臥佛寺

山寺晚景

詠臥佛寺古樹

駐蹕碧雲寺

碧雲寺臨泉望月

碧雲曉起

再賦碧雲曉景

洪光寺盤道

來青軒臨眺二首

法海寺瞻

皇考御書敬佛二字

坐法海寺偶吟

賜聖感寺僧海岫

駐蹕石景山

石景山東望

登戒壇

下戒壇將至潭柘馬上同高士奇聯句二首

潭柘寺偶作

詠潭柘寺竹

石景山望渾河

欽定四庫全書

卷三十一目錄

欽定四庫全書卷

聖祖仁皇帝御製文集卷三十一

古今體詩五十二首

元旦

廣廷揚九奏玉帛麗朝光恭己臨四表垂衣馭八荒

上元

月華連晝色燈火雜星辰彩仗移雙闕瓊筵會大臣

覽貞觀政要

春陽淑以嘉流雲灑几案及此聽政餘縑緗獲披玩寥
寥三古後載籍亦炳煥俯仰十年餘盛治數貞觀修德
偃干戈措刑空狴狴海外奉車書臣民登燕衍事往迹
尚存流風照觚翰洋洋四十篇可以一辭貫仁義有明
效非由事擊斷鄙哉封倫言相去邈河漢

慈寧宮問

太皇太后安

定省深宮曙氣催承恩獻壽捧霞杯晨昏敬覩

慈顏豫不盡歡欣踴躍迴

月

影送樓臺照水明
金波蕩漾遠含清
西山色淨雲初散
南苑風和令正行

昭仁殿

雕梁雙鳳舞畫棟六龍飛
崇高惟在德壯麗豈為威

春夜

玉鑪煙靄盡夜靜百花香
曙氣浮丹陛春光拂象牀

賜舊時講學

几前燭下長談論今日忽為垂老人
憐尔林泉安淡薄
因思疇昔侍楓宸

賜撫遠大將軍圖海二首

兩朝密勿重元臣
秉鉞登壇西定秦
鐘鼎功名懸日月
丹青事業畫麒麟

其二

威名萬里作長城
壁壘旌旗壯遠征
綏靖邊陲馳露布

凱旋立奏泰階平

春日

佳氣山川浹地行
物隨節候變初晴
雪消樹底花爭發
冰泮池頭草欲生

夜半

覽書銀蠟短觀象玉衡長
夜半無窮意心為念萬方

琴

嶧陽桐百尺斲為鳳凰琴
調絲坐石上宛若松風吟希

音合太古貴以鍊予心

晚春遊幸感懷

岸花芳且落樹木含春光
思賞腸應斷長懷萬古傷

河

春風野水穠花發一道帆檣帶柳煙影動長橋橫蟠蜺
岸鋪芳草近南川

白洋湖

遙看白洋水帆開遠樹叢
流平波不動翠色滿湖中

船獵

萬人齊指處一鳥落晴空攜琴鼓櫂返樂與大臣同

水村

孤村綠塘水曠野起春雲槐柳勝南苑青莎有鷺羣

鄭州河道

藻密行舟澀灣多轉楫頻帆懸風正處煙火近通津

喜雨

暮雨霏微過鳳城飄飄灑灑重還輕暗添芳草池塘色

遠慰深宮稼穡情

賜寧古塔將軍巴海詩

并序

鎮守寧古塔等處將軍巴海豐沛舊臣疆場重寄宣
威布德招徠遠人朕甚嘉焉爰賜篇章以旌乃績

夙簡威名將畧雄高牙坐鎮海雲東旌麾到處銷兵氣
壁壘開時壯武功盡使版圖歸化日遠教邊徼被皇風
酬勲世錫丹書重勉爾長思報國忠

橋望

郊原浮麥氣池沼漾青蘋夏日臨橋望薰風處處新

郊外即事

初蟬鳴暑氣雀噪滿林枝蜂蝶花間舞有情人不知

郊外偶作

乳燕銜泥花影靜鳴鳩喚雨樹林深豫遊不獨題詩意
要識熙熙皞皞心

馬上口占

夏日橋頭望遠山兒童戲水水潺潺煙雲數里方知異

野樹汀花白晝間

複道口占

深深複道遠停輦問宮官內苑薰風起榴花滿御闌

夏日登景山同翰林張英高士奇作

日暮登山覽八荒翰林隨輦進辭章君臣同樂松陰下
時雨將來入未央

夜靜讀書

九重夜靜御鑪香
璣典披觀意味長
為念兆民微隱處

孜孜不怠撫遐荒

內廐閱馬

龍種齊嘶御廐旁
追風逐日似飛翔
躡塵不染凌霄志
箇箇真堪號驪驄

夏日同大學士明珠暨諸侍衛過黑龍潭途中作
駿馬駉駉躡綠蘋
羽旗豹尾映龍鱗
暑中荷鍤方知苦
停輦觀苗問稼人

黑龍潭

暗通山下草流出澗邊花空潭深靜處灑翰動龍蛇

由廣泉寺至臥佛寺

巖邊青竹低臨水雲外嵐峰半入天僧舍無人常寂寂
山門洄繞是寒泉

山寺晚景

岸積青苔厚藤抽紫蔓長徘徊風景異翫賞對斜陽

詠臥佛寺古樹

喬木婆娑陰正肥夕陽相對嶺崔巍薰風拂樹涼雲起

暮景蒼然送輦歸

駐蹕碧雲寺

山寺通幽境鶯啼綠樹枝
幡虹迎玉輦剎鳳駐雲旗
翠麓三乘闢佳辰萬騎宜
松陰輝落景遊豫近臣知

碧雲寺臨泉望月

碧雲夜望月初圓
星斗輝煌照九天
滴溜涓涓無止息
此心長使若清泉

碧雲曉起

山中曉起聽蟬鳴遙對峰岑霽色清洞壑有年奇樹老
夢回疑是在蓬瀛

再賦碧雲曉景

夏早日方長南風草木香清涼飄御扇荒剝得恩光

洪光寺盤道

白雲飛夏日斜徑盡崎嶇仙阜崇高異神州覽眺殊

來青軒臨眺二首

搖拂煙雲動翠旗登臨翰墨每相隨山河景象無窮意

俯瞰人情因物知

其二

來青高敞眺神京
斜倚名山澗水清
此日君臣同覽賞
村村雞犬靜無聲

法海寺瞻

皇考御書敬佛二字

重來瞻御筆懷感動心神
丕烈邁前代鴻休啟後人興
文盛禮樂偃武息兵民法則
光華遠千年照佛輪

金匱先生集
卷三十一
生法海寺偶吟

縱目西山宜永日開襟五月似高秋
萬幾偶暇因遊豫期與黎民樂未休

賜聖感寺僧海岫

脩然老衲淨塵緣臺殿參差起瑞煙
馴鴿簷前應受戒遊鱗花下亦參禪

駐蹕石景山

駐蹕荒亭日欲斜潺湲石溜滴雲霞
鸞旗飄動連香草

龍騎驂驪映野花巖洞幽深無鳥跡峰崖高處有人家
青山綠水誰能識懷古登臨翫物華

石景山東望

車書混一業無窮井邑山川今古同地鎮峻嶒標異秀
鳳城遙在白雲中

登戒壇

樓閣高低樹淺深山光水色日沉沉碧墀靜照寒松影
清晝蟬聲響綠陰

下戒壇將至潭柘馬上同士奇聯句二首

嶺腹層層小徑斜

御製

穿雲陟盡石嶺岬

臣高士奇

澗中草屋流泉繞

御製

萬匹龍驤擁翠華

臣高士奇

其二

蟬鳴草木動薰風

御製

蛺蝶雙來引

御驄

臣高士奇時有
雙蝶飛導仗前

潭柘幽深聊駐輦

御製

省方不與豫遊同

臣高士奇

潭柘寺偶作

怡神水樹清襟洽
滿目奇峰入夏雲
微起涼風響萬籟
山中鶯囀奏紛紜

詠潭柘寺竹

翠葉纔抽碧玉枝
經旬清影上階墀
凌霜抱節無人見

終日虛心與鳳期

石景山望渾河

石景遙連漢渾河似帶流
滄波日滾滾浩淼接皇州

聖祖仁皇帝御製文集卷三十一

欽定四庫全書

聖祖仁皇帝御製文集卷三十二目錄

古今體詩三十九首

駐蹕南苑遣使恭進

太皇太后鮮果

南苑元靈宮是

世祖皇考建

南苑行園

德壽寺

南苑晚景

瀛臺偶作

咏水禽

雨

臨城望

夏日有懷

內苑

立秋前一日晚同左右間坐進鮮果

秋蘭

并序

初秋幸西苑觀荷命小舟採蓮

臨池觀魚有懷

夜至三鼓坐待議政大臣奏事有感而作

七夕

沙河途中作

清河荒亭

初秋景山

題日精門古硯

待曉

賜奉命大將軍傑淑二首

秋日咏刀

海子北紅門秋雨後行圍戲作

晾鷹臺

南苑閱馬

中秋望月

賜輔國將軍俄啓詩

并序

秋日晚景有懷

大將軍報吳逆暴死其下賊衆潰散無餘大兵
指日進取恢復封疆

康熙十七年九月初十日奉

太皇太后臨御溫泉恭紀五言排律八韻

駐蹕平家灘

潞河曉起至

太皇太后行殿問安

見雁南飛

駐蹕薊州城南遠眺山村

山中獲野禽恭進

太皇太后

曉起山路口號

原書標題卷次訛誤

欽定四庫全書卷

聖祖仁皇帝御製文集卷三十七

古今體詩三十九首

駐蹕南苑遣使恭進

太皇太后鮮果

日永離宮節候新薰風早已獻嘉珍
赤瑛盤內甘鮮果
奉進

瑤池第一人

欽定四庫全書

卷三十二

南苑元靈宮是

世祖皇考建

傑閣橫霄峻清都與漢翔規模開壯麗星宿燦輝光碧
瓦浮空翠金鋪映日黃門當啼鳥靜戶有異花香細草
沿階發新槐拂檻涼紆迴疏輦路藻彩繪雕梁警蹕臨
仙境瞻依問谷王敬欽崇太昊繼述憶

先皇歲月碑文古乾坤事業昌茫茫扶大造皞皞體穹
蒼恭己身無倦齋心念不忘時巡非逸豫幾暇豈遊荒

衛騎駢驪列華旌宛轉颺南薰披萬物北斗起千祥瑞
氣庭前見佳辰晝正長休歌白雲曲吾道在惟康

南苑行圍

苑中間教陣無事靜論邊不廢時苗典思周天下先

德壽寺

持身崇孝理清淨契真如歲久開金寺時來降玉輿

南苑晚景

薰風南苑翠旂回處處連雲暮色催夜火輝煌盈帳幕

離宮長待萬幾來

瀛臺偶作

蟬鳴槐葉綠魚躍芰荷風太液臨斜景參差更不同

咏水禽

水禽遙泛雪池舟迴披紅桐葉翩翩舞迎薰景未窮

雨

稼穡憂勤在建章油雲灑落滿巖廊凭牕喜雨雨方足
五穀秋成樂萬方

臨城望

城高千仞衛山川虎踞龍盤王氣全
車馬遙看雲霧裏
民間休戚在當前

夏日有懷

木槿花開夏日長
時搖清扇倚方牀
三庚不輟臨朝政
盛暑常思守戰場

內苑

晚涼內苑看槐花
依檻臨池日欲斜
龍戲清潭娛夏景

片雲生處足桑麻

立秋前一日晚同左右間坐進鮮果

初到金風天氣晚微涼雨後畫簾垂九重迴出白雲遠
三殿高臨北斗移珍果滿盤新獻節碧梧一葉報秋時
漏深不寐題詩句月色輝煌照鳳墀

秋蘭

并序

殿前盆卉芳蘭獨秀昔人稱為王者香又以方之君

子因題四韻

猗猗秋蘭色布葉何蔥青愛此王者香著花秀中庭幽
芬散絳帙靜影依疎櫺宜必九畹多侈彼離騷經

初秋幸西苑觀荷命小船採蓮

命駕來西苑初秋向晚天芰荷池沼滿鷗鷺夕陽邊頻
使移輕舫時來獻採蓮離宮闌檻外風動碧翩翩

臨池觀魚有懷

臨池魚躍白雲連太液東邊問小船一色水天明似鏡
風波銷滅在何年

夜至三鼓坐待議政大臣奏事有感而作

午夜迢迢刻漏長
每思戰士幾迴腸
海東波浪何年靖
日望軍書奏凱章

七夕

爽氣三秋早
仙期此夕經
針樓連萬戶
機石動雙星
玉露交珠綴
金風度綺幘
天文在雲漢
流影照彤庭

沙河途中作

輝煌明輦道
將曉漏聲殘
秋月西山落
金風北野寒
望

陵悲樹色就景盼雲端每念芳華日溥溥露未乾

清河荒亭

楸葉晚蟬鳴荒亭蟋蟀聲露凝新樹色日出滿林明
蛺蝶從枝舞蜻蜒點水輕欲看秋景好歸路且徐行

初秋景山

新涼樹色向金天御輦遙停蔓草邊盛暑已過銷夏日
清風纔到有秋年高臨三殿九重閣下看千家萬戶連
薄暮山亭觀射畢回宮複道起蒼煙

題日精門古硯

古硯何年斲雲箋寫御章宮門秋雨濕內殿晚風涼夕
景鑪煙動晴光燭影長文房友筆墨灑翰起龍翔

待曉

閭闔餘殘暑夕籟鳴高秋曖曖月始出泠泠露初浮遠
色淡河漢新涼灑裊裊夜氣倍澄寂庭宇彌清幽眷言
希古則羲軒詎可儔不寐定天保昧爽思旁求徃軫雖
緬邈來途非阻修低徊待申旦治理今何由

賜奉命大將軍傑淑二首

卷旆生風壯氣揚
早持龍節定炎方
秋毫無犯民心悅
盡掃欃槍奏凱章

其二

旄鉞纔臨父老迎
樓船一舉海波清
金甌已定千年業
銅柱須標萬古名

秋日咏刀

七寶刀光耀斗牛
建章佩帶向初秋
清流越砥方知力

截兕刺鯨斷不愁

海子北紅門秋雨後行圍戲作

晝漏稀聞紫陌長
霏霏細雨過南莊
雲飛御苑秋花濕
風到紅門野草香
玉輦遙臨平甸闊
羽旗近傍遠林揚
初晴少頃布圍獵
好趁清涼躍驪驄

晾鷹臺

清晨漫上晾鷹臺
八駿齊登萬馬催
遙望九重雲霧裏
羣臣就景獻詩來

南苑閱馬

渥洼龍種雪霜同毛骨天生氣格雄
八駿齊觀南苑裏
豈誇當日五花驄

中秋望月

坐望中秋月正圓玲瓏丹桂植當天
無私普照八荒外
皎潔清光雲漢邊

賜輔國將軍俄啓詩

并序

內大臣輔國將軍俄啓侍從帷幄勤勞茂著百步穿

楊發矢如電因賜御章以旌其射

觀德由來上古風手持滿月綠沉弓
鷹揚虎視流星遠
中鵠穿楊為世雄

秋日晚景有懷

寒鴉秋景集南林遙倚屏山綺樹陰
丹闕遠砧鳴午夜
玉壺清漏起遐心
衷情靜裏無人識
外象間中有物尋
憶想千般聞落葉
且須持筆漫微吟

大將軍報吳逆暴死其下賊衆潰散無餘大兵指

日進取恢復封疆

遙天今日捷書來，萬里歡聲動地開。
從此黎民皆樂業，軍威應振凱歌迴。

康熙十七年九月初十日奉

太皇太后臨御溫泉恭紀五言排律八韻

慈寧方曉日，掖輦幸溫泉。
羽騎清塵道，華旗衛御前。
九重雙闕迴，三輔萬家連。
蔥鬱東臯樹，蒼茫北嶺煙。
問安頻色喜，侍膳每心懸。
孝養尊

親重時巡法

祖虔村村施化溥處處得恩光
更慮民情隱深慚撫八
埏

駐蹕平家灘

鑾輿駐蹕近滄浪行殿崔嵬對夕陽
郊外村莊時極目
秋成處處有風光

潞河曉起至

太皇太后行殿問安

曉色方明在潞河孤山遠影鬱嵯峨

孤山在潞河之東

寢門恭

問

慈顏喜還愧無能作賦歌

見雁南飛

歸雁南飛有數行南飛度嶺向衡陽
欲將信息傳軍士
早報成功返故鄉

駐蹕薊州城南遠眺山村

萬騎驂驒擁薊城風行雷出遠天清
微霜細草野狐懼

寒露荒煙山鳥鳴捲幔浮涼侵帳殿倚牀明月似都京
欣隨

聖母遊情曠深夜還思勉悃誠

山中獲野禽恭進

太皇太后

吹笳清輦道大地雜旌旂萬壑來秋色千巖散落暉鷹
隨山雉遠箭帶野禽歸遣使呈鮮味須令馬迅飛

曉起山路口號

荒屋山中月色闌
秋高邊塞正風寒
羊腸石道臨泉水
已靜人聲足曠觀

聖祖仁皇帝御製文集卷三十二

欽定四庫全書

聖祖仁皇帝御製文集卷三十三目錄

古今體詩三十六首

恭謁

孝陵

太皇太后駕到溫泉

雨後經明總兵戚繼光所作八角石亭

清晨入盤山二首

欽定四庫全書



聖祖仁皇帝御製文集

卷三十三目錄

古中盤望蓮花峰

盤山絕頂三首

晚過李靖菴二首

星出歸營

奉侍

太皇太后臨御溫泉因孟冬享

廟暫回京

夜半覽本

山中曉色

由鮎魚池出關咏瀑布水

登景忠山

灤河

冬至回京齋戒夜坐

登邊城作

溫泉行

溫泉流杯戲作

南苑橋上大風

雪

景山積雪侍衛下趨如飛

元旦

慈寧宮行禮

春

上元幸萬善殿戲作

收復岳州作

并序

恭上

太皇太后萬壽詩二首

賜大將軍安親王岳樂二首

賜護軍統領桑格

春夜月

題周文矩畫說劍圖

欽定四庫全書卷

聖祖仁皇帝御製文集卷三十三

古今體詩三十六首

恭謁

孝陵

玉殿寒松秘秋霜落樹枝緬懷文武業創立太平基
曉色星辰動晴光日月垂望陵愁不斷孝思起深悲

太皇太后駕到溫泉

溫谷神丹力不窮五雲暖溜繞行宮

聖躬喜得今康豫宇宙歡忻舊日同

雨後經明總兵戚繼光所作八角石亭

華清雨後問安回徐步山椒到水隈
秋木荒池今白草寒花故壘舊青苔
精靈銷散人何處功業留傳志未灰
為將當年堪拊髀亭開八角尚崔嵬

清晨入盤山二首

日出入盤山宸遊草木間
村莊人盡望處處水潺潺

其二

當年乘輦到今日復來遊山水不同色泉聲還細流

古中盤望蓮花峰

中盤遙望蓮花峰日映山林氣色重老衲吟詩渾半偈
翠輿臨發又從容

盤山絕頂三首

上盤絕頂俯神京九月登山積翠晴荒寺日高人少至
野林煙靜鳥無聲道中勒馬觀風景澗下留鑾愛水清

縱目徘徊猶不盡氤氲縹緲海雲輕

其二

四顧清標高逼天風雲塞上斂寒煙遙觀沙漠宣威遠
近控州城作鎮懸紫蓋山中獨竒秀雙峰嶺外更綿聯
九秋朗耀幾千里落葉蕭條滿目前

其三

薄暮東峰來返照遊心怡曠動揮毫題詩數句林光晚
作賦初聯雁陣高盤道峻嶒難步躡危巖截嶺恐身勞

欲歸帳殿還傳語引路山僧度遠臯

晚過李靖菴二首

兩崖石壁出秋雲野草寒林有鹿羣
古剎斜陽人寂寂香煙飄處雜紛紜

其二

蒼茫絕頂樹參差落日還營過竹籬
念及凌煙留姓字獨於古壁一題詩

星出歸營

皎皎星河路向西將歸玉帳渡山溪羽林扈從皆雄將
掃靖煙塵萬馬齊

奉侍

太皇太后臨御溫泉因孟冬享

廟暫回京

金風肅郊甸秋光瀾顥穹曉鐘出長樂羽衛臨新豐
重闌慶康悅遊豫溫泉宮鳴鑣玉輿側侍

蹕清塵中晨夕奉

慈顏婉愉承歡衷原野陪登覽瑞靄光熊應鐘忽屆
節霜露霏空濛夙興感時序廟祀宜欽崇饗獻薦圭璧
對越必微躬暫辭瓊島月還御瑤池驄殿闕欣在望齋
祓明裡通眷言整星駕依戀心靡窮

夜半覽本

初冬夜靜正三更宵旰清心勉勵精自愧事繁機不敏
細披章奏察民情

山中曉色

星漢參差曉色開
高峰初日射莓苔
閒來駐蹕山村靜
坐愛明霞入酒杯

由鮎魚池出關咏瀑布水

巉巖瀑布挂前川
樹冷煙寒幕碧天
關外黎民風俗厚
涵濡威德已多年

登景忠山

景忠遠上日方闌
巖壑層層生早寒
嶺腹凍雲凝玉仗
山中瑞氣接仙鸞
鳴鐘澗裏經聲近
擊鼓樓前樹影殘

繚繞旌旗縈石道六龍行處萬民觀

灤河

寒邊遠繞至灤河徹底清明不見波駐輦徘徊千萬里
石鯨兩岸影嵯峨

冬至回京齋戒夜坐

一陽初發便知天暫別

慈顏日日懸午夜齋明湛心志夢中猶自侍溫泉

登邊城作

冬月荒山落日斜
岩堯野景幾千家
邊城戍色雲煙靜
綠水清河走白沙

溫泉行

溫泉泉水沸且清
仙源遙自丹砂生
沐日浴月泛靈液
微波細浪流琤琤
初經石竇漾暄溜
烈勢直與炎曦爭
潑洄碧澗落花駐
掩映翠巘霜林明
汀迴溪轉入欄檻
甃以文石何澄泓
方壺圓嶠時自暖
紫芝朱草冬常榮
殿啟披香溢石髓
盤低承露浮金莖
冲融太和蓄元氣

炎德利物功難名
氤氲沆瀣結紫霧
縹緲雲霞連赤城
高秋九月天颯爽
鸞旂鳳節紛相迎

慈寧瑤輦度閭闔
絳霄帳殿開蓬瀛
神泉淑景供遊賞
流金漱玉堪怡情
時巡豈必瑤圃遠
對此心意皆和平
華清繡嶺香寂寞
鯨魚鳧雁徒縱橫
曷若茲泉獨標異
萬年勝蹟環神京
歲時來往護

仙蹕點筆為賦溫泉行

溫泉流杯戲作

曉霜早落滿池清一氣涓涓愜勝情偶坐浮杯幾暇日
君臣對景論平生

南苑橋上大風

南苑霜華點翠旗嚴風臘月斷流澌已知朔氣催寒盡
橋跨長虹湧溜遲

雪

細玉輕盈下碧霄和煙飛霰上寒條片纔落地濺濺濕
羅綺花紋處處飄

景山積雪侍衛下趨如飛

憑高縱遠覽積雪明山峰直下數千尺飛騰跨玉龍

元旦

慈寧宮行禮

太簇初分來萬國融融淑景動青陽
瞳矐翠蓋祥雲覆縹緲蘭宮瑞氣揚
節遇三元開寶曆時逢四始奉霞觴
山呼拜舞臣民樂願頌千年正未央

春

旭日含新淑春光覆滿屋東皇轉歲華融氣雜山谷

上元幸萬善殿戲作

雪霽寒輕景物鮮上元臨幸遇叅禪方丈無人般若靜
天花虛落古松前

收復岳州作

并序

逆賊吳三桂既經天誅之後不數月而岳城恢復良
由三桂背恩倡亂荼毒生靈經年以來死者相望於
道路生者逃竄於四方積尸遍野民不聊生皆朕德

之薄不能撫綏之故也今賴

皇天之眷佑

祖宗之威福羣臣盡力將士用命前後恢復閩海兩粵
以至湖南岳陽諸處擒斬賊魁殆盡望風歸正不可
勝數所餘小醜勢如破竹解吾民之倒懸行有日矣
特賦長歌以舒其懷

聿予涼薄莅洪荒遂使巨慝亂天常東南黎庶苦紛擾
幾年戎馬蹂疆場臨軒重簡親藩出軍威萬里風雷疾

肆伐原因討不庭專征大義昭星日臥榻安容有悖狂
太阿豈好弛紀律再勅元臣佩虎符戈矛剗地生寒栗
鐵騎驍騰擁楚雲霓旌閃爍連江濱七澤三湘據衝要
樓船壁壘屯諸軍一時將士盡忿激人人都願成功勲
懸知叛逆衆所惡直須吹氣清妖氛顧此生靈負何罪
流離轉徙多饑餒處處田疇蕪不耕年年桑柘無人採
聞說荒榛遍野廬還傷老弱填江海每念邊陲一慙然
立身天地慙主宰未忍加兵戕我民深宮宵旰勤五載

五載躊躇常恭默會當滅此乃朝食旗捲閩疆甲士降
陣開百粵堅城尅已見懷光伏冥誅更看元濟成俘馘
鼙鼓旌旄定岳陽琱戈金鉞清區域指顧能收六詔煙
宣恩早布招徠德書奏傳來慰

兩宮又安社稷開鴻濛翼翼小心恒敬慎敢忘繼述在
朕躬期與宰司百執事共相砥礪克厥終

恭上

太皇太后萬壽詩二首

和風瑞氣滿簾櫳

慈壽無疆祝上宮喜得萬方同孝養千秋福德竝蒼穹

其二

透戶卿雲接御香彤墀新柳拜韶陽

宮中堯舜兼文母恭捧南山萬壽觴

賜大將軍安親王岳樂二首

大開冊府紀元功伐罪安民將略雄佇見天潢蒙上賞

明光高宴賦彤弓

其二

洞庭南嶽盡提封
九伐勲名勒景鐘
眼底窮荒皆赤子
早銷金甲勸三農

賜護軍統領桑格

百戰威名已早揚
頻年東鉞在巖疆
素知果勇無韜略
應著弘圖肅鬼方

春夜月

晚來風景麗初晴
月色輝籠籠
穿竹樹照耀滿宮幃

題周文矩畫說劍圖

鸞溪尺幅衣冠古貌出蒙莊辯論新劍客滿前毛髮動
須知繪事亦通神

聖祖仁皇帝御製文集卷三十三